

— Тындасаң, менің анық көзім жеткен нәрсе: егер екі жасты өнерге деген құштарлық табыстырса, ол екеуі өмірден өкінішсіз, бақытты жұп болып өтуге тиіс. Осы есінде жүрсін...

Қазір Назым аяулы әкесінің сол сөзін қайта еске алып отыр. Ол Айгүл мен Берікке тағы бұрылып, қабаттай қарады. Сыртына шығармаса несі бар, «Сен екеуіңді өнерге деген құрмет, ынта, елгезектік табыстырғай!» дегісі келіп еді. Соны іштей де болса, шын көңілімен айта алған жоқ.

Көкірегінің құлазығанын сезді.



Ноктюрн

Айсыз түн еді. Нұрболат Жайықтың құлама қабағында жалғыз қалды...

Не себепті екенін кім білсін, кемеге еш қатысы жоқ, колдан егілген орманы қалың да биік осы бір иінді ел Затон деп атайтын (әйтпесе «затон» деген сөз «кеме жөндейтін жер» деген түсінік береді ғой). Сыртында — қалың ағаш, алдында — өзен, аядай ғана ашық жерде отыр...

Өзеннің екінші бетіндегі селоға қайтсе де өтіп, алдағы таңда автобуспен төмен жүріп кетуі керек. Бұл жерге келгелі көп болды — ол кезде күн ұясына енді-енді еңкейе бастаған. Қырдан осы араға көлігімен жеткізіп салған жігіттің сендіре айтқан сөзі теріске шықты — бұл қанша сарсылғанмен қайық ұшыраспады. Жер жағдайына қанық емес жанашыры Нұрболатты, қажет тұсты дәл бағдарлай алмай, едәуір қиыс түсіріпті. Орман ішіндегі жалғызаяқ соқпақпен аяндап жағаға іліккенде ғана бұған көзі жетті жүргіншінің. Қалыңға қайта сіңіп, селоның тұсынан шығуға зауқы соқпай, оны артық бейнет, бос жүріске балап, бағын осы жерде отырып-ақ сынамаққа бекінген. «Су бойынан күндіз қайық үзіле ме, балықшы не әншейін сейіл құрған біреу-міреу ұшырасар» деген...

Сол мана, Нұрболат жағаға жетіп, тізе бүккен шамада, көп күттірмейтін жақсылықтың хабаршысы сияктанып, селоға карама-қарсы мүйіс жактан ән естілген; ол да ізім-қайым тынып қалды. Жігіт енді осы арада өткізген үш-төрт сағатын біртіндеп қайта еске түсіргеніне мәз.

...Ән әуеге бірте-бірте қалықтай көтерілді. Арман мен сырға толы, үздіге шырқаған әйел адамның сыршыл да әсем даусы. Бұл Нұрболатқа көптен таныс ескі ән. Көк пен жер, баяу жылжыған арна, қарсы беттің көлеңкелі аласа жиегі — бәрі осы саздан үндестік тауып, сыр шертісетін сияктанады. Мүйістен өзенге сұғынып тұрған жарты аралда жүрген ұсақ құстардың ғана әнмен ісі жоқ.

Еңкейіп бара жатқан күннің қызғылт сәулесімен өзен де түрленсіп сұлу, сыңғыр құпияға бөгіп тұрғандай көрінеді. Табиғат көркіне, мүмкін, жаңағы ән айтқан әйел даусының іңкәр бояуы қосылып, сезімді үстемеледі ме — бір сәт Нұрболат өзінің жарқабаққа қаракұсша қонжыған отырысына да риза сияктанды. Әсіресе ұлы өзендерді қарт анамен тенесек жарасар. Солай бола тұрғанымен, дәл осы жолы жігіт басқаша топшылап еді. Оның көз алдына ертеңнен тыным көрмей, сан-сапалақ күйбеңмен кешке жеткенше ақыры қайратын шалдырып, қолаң қара шашын екіге жарып, қапталына бос тастап, бір сәт тыным аймақ болып қисайған жас арудың суреті келген. Жігіттің нәзік жаны елес берген сиқырлы бейнеден ереуілдеп, көкірегінде сыршыл күмбір оянып, домбыраның сағақ күйінше үзілмей ынтықтырып, әлсін-әлі жүйкенің әлдебір жалаңаш нүктелеріне тебіренге тиіп, бұратылып, толқып тұрып алды. Енді, қараңғылық түскелі бері, ол бейне де көңілден біржола көшті. «Осы бетте елсіз жағаны күзетіп қалып қоймасам не қылсын!» деген ой ғана естен шықпай, үздіксіз мазалайды.

Нұрболаттың бұрын Жайықтың осы тұсында, осы бетте — дәлірек айтқанда, селоның тура қарсысында — айға жуық тұрғаны бар. Одан бері де он екі — он үш жыл өтіп кетіпті-ау. Институттың үшінші курсын бітірген жылы шағын топпен мына қалың орман үлкен жолға тірелетін жердегі алаңқайға шатыр тігіп, жақын маңның өсімдік, жан-жануар дүниесін зерттеген.

Сол жерде отбасымен Демеу есімді қарт тұрды. Паромшы еді. Кемпірі, Несібелі есімді алты-жетілердегі жалғыз қызы, он бір — он екілерді төңіректеп қалған Шакун есімді мылқау балдызы болатын.

Өзен жағасындағы алаңқайда ұсақталған шыны сияқты аппақ құмға шиырлап із салып, ылғи астық тасыған мәшина, көлік үзілмейтін. Әсіресе кешкісін арғы беттегі қабақтың басында да қаран-құраң көшіп, ол жақтағылар «Паре-е-м! Паре-е-м!» деп айқайлап тұратын. Паром күткен екі беттегі ел күн ыстық мезгілде іркес-тіркес өзенге құлап, кейбірі суға шомылса, кейбірі әншейін жуынып-шайынып, шаңнан арылып, солық басып жататын.

Паромшы қарт Отан соғысының мүтедегі еді. Өзінің ертеректе ептен орысша тіл сындырған, тіпті аздап ұстаздық та еткен жайы

бар. Қарттың аяғы шойнақ, қолы маймақ, беті жақыннан жарылып, ет пен терінің арасына сіңіп қалған дәрінің әсерінен көк-ала; ертелі-кеш күркілдеп ауыз жаппайтыны қосылады бұған. Сол жарымжан күйімен жалғыз қолдап паром айдап, «Жігіттер, күш біріктіріп жіберейік, қауырт кез ғой, ел күтіп қалар!» деп жанығып, ала таңнан көз байланғанша тыным көрмейтін.

Нұрболат наразы екенін жасырмай:

– Неге жеңілірек тірлікті қаламадыңыз, ақсақал? Мынау дінкеге тиетін іс қой! – деп, аяушылық білдірді бір жолы. Сонда кеудесі сырылдап тұрып Демекен:

– Қайратым саркылмай жатып тыныштық іздесем, бұрынғы күйіп-жанған кезіме, жас дәуреніме қиянат еткенмін емес пе? Әрі енді менің қолымнан бұдан өзге, елге осыншалықты пайдалы, не іс келеді? Шаршасам, жүргінші, өткен-кеткен қол ұшын береді, тіпті болмай жатса, кемпір де көмектесе қояды. Шындап кіріссе, пенде тындыра алмайтын іс бола ма. «Әлім келмейді» деу – әншейін жалқаулардың желеуі ғой, – деп, қоңырқай рең танытқан.

Нұрболат құрт-құмырсқа, шөп-шалам жинаудан қолы қалт еткенде ылғи Демеу қарттың жанында болуға тырысып тұрар еді. Жауырыны қаппақтай, тау копарса да лайық, жиырмаға әлі ілікпеген жас жігіт қария тындырып жүрген іске қарағанда келеңсіз көрінетін өз тірлігі үшін ұялатын, Демекеннің алдында іштей төменшіктей беретін. Екі бетте де жүргінші үзіліп қалған өте сирек сәттерде қарт кенет болдырып, керзі етігін боршылдата қиралақтаған күйі сызға түсіп, ескі көн сияктанып кеткен қара-қошқыл жүзін Жайықтың төменгі ағысына бере, солықтап ұзақ отыратын. Шамасы, ол шөлейттің әлдебір үздік-создық керуеніндей бекеті қашық ойға берілер еді. Сосын ыңылмен бастап, мана кешкісін естілген әнді айтатын:

«Көрінген сонадайдан Нарын еді,
Көтерген сол Нарынды сағым еді.
Аралап алты алашты жүрген кезде
Жайықтан салып қайтқан әнім еді...»

Нұрболат қарттың бір уыс күйкі түріне қарап отырып, оның көкірегінде үлкен жүректің – өз тіршілігіне ғана мәз тоғышардың емес, өмірден арман-тілегіне ылғи түгел жете алмай өтетін шын азаматтың жүрегін – жатқанын анық аңғаратын.

Бір жолы қария ағыс иінге айдап әкелген кеуек томар, шөп-шаламды ерінбей сүзіп алып, қабақтың басына апарып үйді. Нұрболат бұл жолы да ойсыз, жеңіл тұжырым жасаған:

– Өй, қосағасы, өзіңіз қызық екенсіз ғой! – деп дарақыланып күлген. – Мына сияқты дарияға мұндай елеусіз нәрсе не зиянын тигізуші еді?! Құр бекер михнаттанғаныңыз не?

Қарт әуелі бұл сөзге жауап бере қоймай, жігітті барлай бағып отырды да, қарсы сұрақ қойды:

– Сен өзін, шырағым... жәндік, өсімдік түрлерін босқа жинап жүр ме ең?.. Неше жастасың?

Жігіт мүдіріңкіреп барып жасын айтты.

– М-м... – деп қойды қария, тұрлаусыздау үнмен. – Олай болса, тыңда, – деді. – Сол сенің қатарларың дүниеге келетін шамада мына жатқан өзен қазіргідей еңсіз, тайыз емес еді. Ол жылдары менің бір себеппен балықшыларға қосылып, дәмдес болғаным бар. Сонда Жайыққа бір орап салған ауға іліккен балықты өгіз арбамен түстік жерге әлденеше күн тасығаным есімде. Қазір сондай ауға екі-үш асымдық қана балық түседі, және ол ауды салатын айдын да жоқ – судың беті тар... Ал енді көктемде, өр суы келіп, өзен тасыған кезде, не болатын еді дейсің ғой? Көзің жамандық көрмесін, Жайық дес бермей, әсіресе осы бетке он бес – жиырма шақырым ендеп, аспан астын ақ айдын етер еді. Соңынан, су қайтып, көк шыққанда, ел әлгі мол ылғалдың қызығын көрер еді. Ақиқатына келгенде, гәп судың әншейін бар не жоқтығында емес, екі бетін қаппай қонған елдің ырысына қосарында, үмітін ақтарында ғой, шырағым...

– Иә, тірі пенде сияқты су да қартаяды, тозады, шөгеді, – деді қария екінші жолы. – Оның өз танабының тартылатыны, көзінің бітелетіні бар, бұған қоса адам да ылғи қамқор көңілмен қарамай, ақылсыз іс істейді. Бүйтіп қорлай берсек: түбі немен тынарын ойламай, тиген-тиген жерден бөліп алып, анаған да, мынаған да пайдалансақ, өр суын бөгеп жібермесек, онымен де қоймай, лай, қоқыс төксек – мына қайран Жайық күндердің күнінде өліп тынатын шығар...

Әсіресе қарттың осы соңғы сөзі – ажал мен Жайықты қатар ауызға алуы, соған байланысты үнінен анық аңғарылып тұрған зардапты, зарлы түйткілі Нұрболаттың санасын осып кетіп еді.

Паромшының жапырайған баспанасы мен Нұрболаттар көлеңке бетіне шатыр тіккен теректің арасы қырық-елу метрдей болатын.

Несібелі ұйқысынан күнде бір мезгілде – ұлы сәске шамасында – оянатын. Оянысымен далаға жүгіріп шығатын да, шапшы жалбырап, терісінің қоңыр түсі алыстан қарағанда одан сайын қоңырая түсіп, көзін аша алмай қолымен күннен қалқалап, едәуір уақыт тұратын. Сосын кенет қолын бетінен тартып алып, қарашығын күнге қадауға тырыса қасарып, құшағын жаятын. Осыдан кейін рахатқа батып

сықылықтап күлер еді де, әкесінің паромы тоқтайтын осы беттегі тұсты бағдарға алып, жүгіре жөнелер еді. Сыдыртып бара жатқанда күнге көп тимеген акшылдау табаны кезек жалтылдап көрінер еді.

— Қартайыш, жас иістен күдер үзгенде төс шандырымды жібіткен қарағым-ау! — деп отырар еді Несібелінің сол кездің өзінде мосқал анасы, бара өзеннің тайыз жеріне түсіп, суды шалшылдата бастаған қызын қашықтан көзімен аймалап.

Кейде оның қызына аз-кем дауыс көтеріп:

— Несібелі, кел, көмектес! Ақсаусақ болып өсіп, соңыра елдің мазағына қалып жүрерсің. Не қызық бар сол суы құрғырда, шомыла беретіндей? — дейтіні бар-ды. Мұндайды құлағы шалса, әсіресе кемпірі қазымырлау болып кеткен сәттерде, Демеу қарт реніш білдіретін:

— Жұмса, бірақ аузыңды ашқаннан апшысын қуырмай, бабымен жұмсауға болмай ма? Әлі кішкентай, ойын баласы екенін де естен шығармағың жөн. Ең болмаса, осы кезде Жайықтың суына еркінше шомылып, құмына аунап өссін дағы. Сосын да үлгересің ғой, — дейтін.

Демеукеңнің үйіндегі екінші қыз бала — Шақун де көз алдында Нұрболаттың. Несібелі дөңгелек бітімді, акшыл өңді өз анасына ұқсамайтын, керісінше, нағашы апасы Шақунмен рендес еді. Жиенінен гөрі көзінің аласы ғана көбірек пе деп қалатынсың Шақунның.

Демеу қарттың кемпірі сінлісін аяп, оның тағдырына ылғи жаны ауырып, күйзеліп отыратын. Сондықтан шығар, өзі көмекшіге әлгідей зәру екеніне қарамастан, бой жете бастаған қызды ештеңеге жұмсамайтын. Осыған байланысты Шақунның жатқысы келсе жатып, тұрғысы келсе тұрып, еркінше жүретін әдеті бар-ды. Кейде ол тіпті жеті түнде жалғыз барып, өзенге шомылып немесе сол тастай қараңғыда жаға кезіп кетер еді. Суға бір түссе, капелімде шығуға асықпай-ды; сүңгісе, өзеннің ортасына жуықтап барып бір көрінеді. Шақунның неге мылқаулар үйіне берілмегенін Нұрболат білмейді. Бұған тағы да Демеукең кемпірінің жанашырлығы кінәлі-ау деп есептейді.

Демеу қарт қана Шақунның тәрбиесін естен шығармай, әл-қадарынша көңіл бөліп жүретін, көбінесе қызды жағаға жетелеп апарып, жеңіл-желпі іске қосар еді. Ниетін салып, сәтті тындырған болмашы ісі үшін оны еркелетіп, көңілін көтеретін. Ондай кезде Шақун де шырайланып, әлдене айтқысы келген кісіше жұтына алаңдап, әдетінше басының ауған жағына жүре беруден өзін тежеп, айналып-үйріліп сол маңнан ұзамай қоятын. Жалпы, сырларына қанық емес, сырттарынан қараған жанға бұл көрініс әкелі-балалы екі кісінің үнсіз ұғынысуы сияқты әсер қалдыратын.

...Көп жыл өтті ғой. Өзі талай рет дәм-тұзына ортақтасқан шаңырақтың мүшелерімен дәл осы түні дидарласамын, ол үй әлі сол орнында тұр деп Нұрболат әсте ойлаған жоқ...

* * *

Қараңғылық тез түсті. Әуелі су мен ауаның тұтастығы бұзылып, аспанның түндігі жабыла бастаған, ізінше қарсы беттегі бұйра тоғай мен құмайт жағалау көзден тасалана берді. Екі жаға ортадағы суды қусырып, біріне бірі қарсы жылыжып келе жатқандай әсер туғызады.

Кенет Нұрболаттың қарсы алдынан салқын да сараң сәуле бүркіп, жалғыз жұлдыз жылтырай қалды. Сонда барып жігіт ағаш ішіндегі мақұлық біткеннің мүлгіген бір тылсым тыныштыққа ауысқанына көңіл бөліп, өзін жайсыз сезіне бастады.

Төрт-бес қадамдай сол қолда тамырын тасқын шайған алып терек қарауытып, суға төніп тұр. Жарды астынан кеулеген иірім онсыз да көрер жарығы өлшеулі теректі «Бүгінгі түннен қалма, қалма, қалма!..» деп арбағандай, ақырын, тұншыға сылдырайды.

Сағат он жарымдардың шамасында сәтсіздіктің тәлкегіне бұдан әрі көнбей, жатып алып қорылға басайын деген қоңырқай ой келді Нұрболатқа. Әуелі, қарманып жүріп, астына төсейтін шөп жұлып алды. Сосын жайғасып отырып, шылым шегуге кірісті.

Нұрболат бойжеткенді тура осы сәтте байқап еді. Болар-болмас сыбдырды құлағы шалған соң сыртына бұрылса... ол мұның көк желкесінде ағашқа сүйеніп тұр екен.

Ағаш Нұрболат қас пен көздің арасында біреу ағашқа ақ мата іліп кеткен бе деп қалды. Үйреншікті бап бұзылғанда адам не істеп, не қойғанын білмейді емес пе — сүріне-қабына жанына жетіп барды. Әйел адам екенін де сол жақыннан байқады. Бойы ортадан жоғарылау, бет-әлпеті, аяқ-қолы жөнді көрінбейді. Жыланыша иіріліп, кеудесінде жуан өрім қап-қара жалғыз бұрымы жатыр. Көкірегін қақ жара түсіп, оң жақ мықынын орай сырт айналып кеткен.

— Сәлеметсіз бе, қарындас! — деді жігіт, үнін байсалды шығаруға тырысып. Қарсысында тұрған жан, тастай қатқан қалпы, селт етпеді.

— Бұл өңірге соқпағалы көп жыл болып еді, бағдардан шатасып, әлденеше сағаттан бері тығырыққа тіреліп отырмын. Маған сізді құдай айдап жолықтырған шығар, ақыл-кеңес беріңіз, — деді жігіт. Айтуын айтқанмен, кәрілерше мәнерлей сөйлегені өзіне ұнамай, бұдан әрі әңгіменің турасына көшті: — Осы жердің кісісі болсаңыз, қайық жағын қарастырмас па екенсіз?

Тағы жауап естілмеді. Кенет сап ете қалған болжамнан Нұрболаттың жүрегі жидірмелете соқты. Ақ киген бейтаныс жанға әлде де жақындай түсіп, үңіліп еді, қараңғы бола берсін, оның жалт еткен жанарын аңғарған сияқтанады. «Осының өзі Шакун емес пе?!» деп, тіксініп тұр енді.

Келесі сәтте бойжеткеннің Нұрболат сөз еткен шаруаның төркінін түсінгені айқын болды: теректен ширақ серпілді де, қалыңға ене берді. Екі-үш аттап барып кідірген аяқ дыбысынан соңыма ілесуіне болады деген ишаратын ұқты жігіт...

Ақ түс оң мен солға кезек жалт беріп, бірде ырғып жоғары шығып, бірде секіріп төмен түсіп, қылаң беріп қана көрінеді. Алғашқы кезде оның бұрылған жағына шұғыл бұрыламын деп, қасақана қарсы алдынан тап болған терекке соғылып, талай жерін жарақаттады Нұрболат. Бірақ оны есептеп жататын кез бе! Бет алдын бұтақтан қорғалай, тұқырып барып тас төбесінен шаншылады да, жалма-жан қараңғы қапастан серігін іздей бастайды. Ол, қайтіп сезсе өйтіп сезсін, мұның құлағанын сезеді – тоқтай қалады. «Қап, мыналарды-ай!» дейді жігіт, тілі жоқ кісінің құлағының да естімейтінін тарс естен шығарып. Анау, тым құрыса, мырс етер ме деп, елендейді. Бос үміт қой, – бойжеткен сол бойда тағы ілгері жөнеледі.

«Жын ба, шайтан ба мына бәлекет?! – деген ой келеді бастаушысының кім екенін әлі дәл біле алмай келе жатқан жігітке, бір мезет. – Тастай қараңғыда мыңсан ағаштың арасымен өзінің үйреншікті бөлмесінде жүргеннен бетер еркін қозғалады. Сонда мұның көзі ерекше көз бе әлде әр теректің, әр бұтаның орнын, бір-бірінен ара қашықтығын мүлтіксіз хаптап алардай зердесі ерекше жаратылған зерде ме?!»

Орман іші сыз, аяқ асты ұйысқан шөп, жапырақ. Терең жыраларға түскенде ескі қопаның күлімсі салқын иісі денені тітіркендіреді. Сәл кейіндесе тіпті елесінен де ажырап қалатындай көрініп, Нұрболат бастаушысын өкшелеп келеді. Бойжеткеннің бетіне тигізбей қағып, серпіген бұтақтары мұның үстінен зулап өгіп жатыр...

Кешікпей екеуі өзен жағасына шықты. Манағыдай емес, ойлаңдау жардан алдымен түскен жігіт бастаушысына қолын созды. Елемес не қағып тастар деп ойлаған, – өйтпеді. Сүп-сүйір, ып-ыстық саусақтарын жігіттің уысына сұқты да, қабақтан еппен сырғып, тура қасына келіп дік етті. Оның анық Шакун екенін де, сонау бала кезіндегідей емес, ерекше реңін де сонда барып аңғарды Нұрболат. Бойжеткеннің екі көзі тостағандай еді!..

Жалт бұрылды. Сәл ұзап барып, аяқкиімін шешіп қолына алды да, ылғал жиекті қуалай, тағы да жедел аяндай жөнелді.

Нұрболат қайыққа бағыт алған шығармыз деген, олай болмай шықты: Шакун жиекке жеңіл жүру үшін ғана түскен екен. Сүт пісірімдей аяндағасын шұғыл бұрылып, жылғамен тағы қабаққа өрледі. Сосын жагадан қаша жүрді де, ұзамай екеуі кішілеу қиықты үйге маңдай тіреді.

* * *

– Қарт қайтқан, – деді Демекеннің кемпірі. Қонақ диванда, кейуана неш түбіндегі төсеніш үстінде отыр. «Қартайған екен!» деп ойлап қойды Нұрболат. «Шәй ішіп кетесің» деп, үлкен кісі мұның сәлемдесісімен кері шығып кетуіне рұқсат етпеген.

– Жақсы кісі еді... Топырағы торқа болсын!.. Ұзақ ауырды ма?

– Жок... Әуелден сикалы еді ғой. Тек әншейін кеудесін сүйретіп жүре беретін, қайтіп қиналсын мейлі, білдірмейтін. Сонысына қарап, ел оның сүйегі мықты дейтін... Көкірегінің өзінде әлденеше жерде кіріп қалған шойын бар еді, – қоя ма! Басқаға не жорық, тіпті мен де сезбедім татар дәмінің азайғанын. Сол баяғы өзің білетін қалпы – «Паром, ойбай, паром!..» Ақыры сол қауырт шақ – жаз ортасында паромның басында өлді. Бақұлдасып, тапсыратындарын тапсырып қана үлгерді. Одан бері де, міне, бес жыл өтіп, алтыншы жылға аяқ басыпты...

Бөлмеде қонақ пен үй иесі кемпір екеуі ғана. Шакун Нұрболатты ішке кіргізісімен төрге көрпе жайып, кері шығып кеткен, содан бері көрінген жоқ. Оның жүзіне тек бір рет қана көз тастап үлгерді Нұрболат. Бойжеткеннің жұмбаққа толы ерен көркі, енді сәл мұңды, тұңғық қос жанары ғана емес, тұтас бітімі бұнын тұла бойын шымыр еткізіп, жүрегін әлденемен матап тастағандай болған. Қазір оны жарда ілулі тұрған үлкен фотосуреттен көріп отыр. Сол жаңағы айшықты қас-қабақ, сол тәкаппар, асқақ жаратылыс. Белгілі суретшілер әйел көркінің бұл сияқты өте сирек бітісімен дидактасқанда оның алдында бас иіп, сол серпілістен туған шығармаларын «Белгісіз әйел бейнесі», «Жұмбақ жан» деп атаған. «Солардың қай-қайсысын да бәсекеге еркін шақырып, тең тұрып тайталаса алағын хас арудың жүрген жерін кара!» деп қуанады жігіт. Енді бұл жайға байланысты Нұрболат үшін бір ғана нәрсе қараңғы. Шакунды суретке (жай сурет емес, түрлітүсті фотоға!) кім түсірді, кім қызды әзірлеп, шашын, қас-қабағын түзеп, қапысыз талғаммен киіндіріп, қам жасады – осыған мыйы жетпей отыр.

Кемпір орнынан тұрып, әрең қозғала жүріп шәй даярлады. Дастарқанға нан, май, қант қойды. «Қарағым, тек әншейін біздің қарт марқұммен сырлас болып едім деген соң, сосын бұрын да көре қалғанымыз бар, қуыс үйден құрауыз шықпай, дәм татып кетсін деп

жатқаным ғой, барға риза боласың» деп ескертті. Нұрболат «Қойыңыз, ол не дегеніңіз!» деп, елпектеп қалды, алдын ала рақметін айтып, төрдегі көрпе үстіне тізе бүкті.

— Мына үйіңіз баяғы зілмәңке емес сияқты ғой? — деді қонақ жігіт аз отырыстан кейін. — Жаңартып қайта салғанбысыздар?

— Иә, бұрынғы үй емес. Бұл үйдің салынып біткені осы биыл ғана. Несібелімнің, қала берді, мына Шақунның арқасы ғой. Онып қалдық тіпті: үш бөлмесі бар, таза, жарық! Әуелі: «Қайтесіндер соны, бұл жерде енді қанша тұрармыз дейсіңдер. Менен көмек аз, қартайдым, — құр әншейін қайратқа тиер», — деп көріп ем, Несібелі көнбеді. «Өзгені білмеймін, өз басым осы жерден табан аудармаймын!» деп отырып алды. Сосын билікті өздеріне бергенмінді. Қиналғандары рас, бірақ тез бітірді. Дос-жарандары көмектесті дегендей. Біткесін-ақ белгілі ғой...

Нұрболат «Шақун...» деп келе жатыр еді:

— Шақун байғұстың ендігі жайы осы, шырағым, — деді үлкен кісі, төмен қарап, дастарқанның жиегін шұқып. — Ақыры ешқайда жібермедік. Енді әбден бойжетті, тұлға, көрік дегенің — анау! Алдында не нәрсе күтіп тұрғанын кім білсін... Зердесіз де емес. Осындай шүкір етерлік болып өсуіне біздің қарт байғұстың көмегі көп болды ма деп ойлаймын... Өзің де көрдің: сені әдейі әлдекім сияктандырып арғы бетке өткізе салмай, әуелі үйге алып келіп отыр. Тұр-түсіңе қарап: «Аптабозға бізден кетіп мінсін, жеті түнде тағы кімнің есігін қағып, сұранып жүреді?» — деуі немесе тіпті өзіңді шырамылтуы да ғажап емес. Айтпақшы, иә, есіме енді түсіп отыр, баяғыда жолдастарыңмен түскен көртішкелерің бар екен ғой бізде...

— Еңбек ете ме?

— Еткенде қандай: паромшы! Қайрат дегенін ғаламат — паромның көлік басып өтетін қаңылтырмен қапталған тақтайларын бір қолымен лақтырады. Мотордың тілін, жүргізу-тұрғызуын түгел біледі...

* * *

Бұл түннің Нұрболатқа сақтаған сыйы тек осымен аяқталмапты...

Дастарқан жиналған соң отырған орнынан тұрып, қайта диванға жайғасқан қонақ жанында тұрған үстел үстінен кішкене альбом көрді. Сурет альбомы ма деген оймен қол созып еді... жыр екен. Үлкенді-кішілі көп өлең!

— Мына өлеңдер... кімдікі? — деді жігіт, таңқалғанын жасыра алмай.

— Нені айтасың, шырағым?

Нұрболат альбомды көрсетті.

— Ә-ә... Несібелінікі ғой. Құйттай кезінен шығарады. Әкесі марқұм жүрегі жарыла қуанып, мақтанушы еді.

— Қарап шығуға рұқсат па екен?

— Қара, шырағым, кара. Бірдеңесі кетер деймісің қарағаннан. Не бөтендігін бар...

Рұқсат алуын алғанмен, Несібелінің өз ризашылығы болмаған соң, Нұрболат жүрексініп отыр. Сондықтан асығыстау ақтарды альбомды. Орта тұсына жеткенде ғана ол шұқшия үніліп, ұзақ кідірді. Сол беттегі осыдан дәл бес жыл бұрын жазылғаны көрсетілген, шамасы, шаңырақ иесі жерге түскен соң көп ұзамай дүниеге келген өлең көзіне оттай басылып еді жігіттің. Әлденеше рет оқып шықты. Өлеңде қыздың әкесі жайлы бір ауыз сөз жоқ, туған жерге, Жайыққа ғана арналған жыр. Әйтсе де, жырды дүниеге келтірген үлкен сезімді әке қазасы ширықтырып, шерлендіре түскені анық аңғарылады. Бұл — Несібелінің Нұрболат еш күтпеген тағы бір жарқыраған қыры еді! Өлеңде симметрия сақталмаған, әйтсе де оны жақсы дүние деді Нұрболат.

— Несібелі қарындас қазір қайда? — деді қонақ. Осыған дейін әлденеше рет оқтала тұра, үлкен кісінің өзі айтар деп сұрамаған.

— Елде, — деді Несібелінің анасы.

— Оны түсіндім...

— Ә-ә, дәл осы сәтте деймісің?.. Мана кешкісін ауданға кеткен. Ертең сол жақта жиналыс бар ма екен...

— Ұзақ кідіре ме?

— Қарындасыңды көріп кеткің келе ме, карағым? Бірақ... ол екі-үш күнсіз келмес.

Нұрболат өкініп қалды: бұл төмен қарай, ағыстың бағытында, кетуге тиіс, ал аудан орталығы жоғарыда қалатын. Жолшыбай болғанда сөзсіз диаларласатын еді.

— Не істейді?

— Несібелі ме?.. Орман қарайды. Жайықтың осы тұсының ат аяғы жетер жердегі орман соның билігінде.

— Лесник пе?

— Жоқ, лесник емес, басқа бірдеңе деп аталады... — Осыдан кейін кемпір Нұрболаттың аузынан енді-енді шығуға тиіс сауалға алдын ала жауап беріп қуантты: — Әкесі қайтқан жылы бұл бала сегізінші класс бітірген... Марқұм, қызымен күні бұрын ақылдасып, «Жаның нені қалайды?» деп сұрап, оны ақыры Ресей ішіндегі үлкен қалалардың біріне барып, оқуға түсуге көндірген. Дүниеден озар шағында қалған тұтам уақытының көбін тағы қызына бөліп, оны қинап, «Сонда барамын!» деген уәдесін алып кетті жарықтық. Маған

да соны мұқияттады. Сөйте тұрғанмен, әкесі көз жұмған соң, қызымыз мені тастап кеткісі келмей, көп қипақтады. Қипақтағанмен, ақыры аруаққа берген уәдесінен аттай алған жоқ. Мен де мұрындық болдым — «Бар да бардың» астына алып қоймадым. Өзінің де көңіліндегі оқу еді ғой, — барып, үш-төрт жылда аман-есен бітіріп келді. Содан бері осында. Ертеңнен қара кешке дейін орман кезіп, сабылып жүргені. Сонда да «шаршадым» деп бір айтпайды... — Сәл үнсіздіктен кейін: — Ол да бойжетті енді... — деп, тұрлаусыздау күңгір үнмен қосып қойды байғұс ана.

Есік ашылып, Шақун көрінді.

— Ал, шырағым, қонбайтыныңды айттың... Аман бол, жолың түскенде соғып тұр, қашан болса да, — деді үлкен кісі.

— Мың да бір рақмет, жаныңыз жамандық көрмесін! — Нұрболат диваннан тұрып, есікке беттеді. Сөмкесі мен желқағарын алып, кемпірге бас иді. — Несібеліге сәлем айтыңыз!

— Айтайын, шырағым, айтайын. Қуанып қалады ол: әкесі сияқты көпшіл, қонақжай болып өсті қызымыз, — деп, орнынан тұрған кемпір кері бұрылып, төрге ілінген манағы портретке қарады. Нұрболат ойына шұғыл келген жорамалды өзі де дұрыс пайымдап үлгерместен үзік сұрақ қойды:

— Бұл сурет?..

— Е, Несібелі қарындасыңның кәртішкесі ғой. Бағанадан бері танымай отыр ма ең?! — деп таңқалды үлкен кісі.

* * *

Шақун қабак басындағы қадаға бұрылып, әлденеге қол созғандай болып еді, паром маңы жап-жарық болып кетті. Нұрболат таңқалып тұр: жаға да өзгерген, жағаның жабдығы да өзгерген — бәрі өзгерген! Ана жылы өзі түгіл аты жоқ моторлы әлденеше қайық байланыпты жиекке. Паромның тасасында сол пароммен қосақтаулы үлкен катер қарауытады.

Жігіт жағадағы жалғыз ескекті қайықты байқап, соған беттеді. Шақун соңынан ілесті. Енді, міне, екеуі ағыстың бірқырындау ыңғайына көшіп, жеңіл жылжып келеді. Нұрболат асықпай баппен есуде. Оның жаны жадыра, көңілі қуанышқа толы еді.

Туған топырақ, жер, су жайлы ойлады жігіт. Мына Жайық бойы Нұрболат үшін қазір өзінің кір жуып, кіндік кескен даласындай қымбат. «Елдің, жердің шеттен келген кісінің алдындағы қадір-қасиеті сол өңірдің өз ұл-қыздарының туған топыраққа деген ыстық сезімі арқылы артады екен ғой! — деп толғанады. — Бұған қоса, бұрын етене емес жерге

ат ізін салғаннан кейін пайда болған тың қимастығыңның көкірегіңді қоламтаның шоғынша ылғи жылытып тұратыны, өз жеріне, суыңа деген ықыласыңды үстемелейтіні неткен ғажап заңдылық!..»

Нұрболаттың ойына Несібелінің жыры оралды. «Демекеннің өзі өлгенмен, оның үлкен жүрегі өлмей, кейінгілерге мұра болып қалыпты-ау!» деп қойды. Қайықтың ескексіз басында Шақунның бейнесі ағарады. Ол үнсіз. Үнсіз болғанмен, ешкіммен ешқашан бөлісе алмағанымен, оның да тал бойында сыр, сезім тұнып тұр — мұны да Нұрболат енді анық біледі! Сол Шақунға қарап отырып, Несібелінің жырын оқыды жігіт:

«Аяулым менің — өзенім!..
Суыңды балдай сіміріп,
Нуыңда талмай жүгіріп
Өсіп ем, — келді кезегім...
Бұғанам қатпай талпындым,
Биікті аңсап шарқ ұрдым.
Алыстың дәмін татармын,
Ақ құсың болып қайтармын, —
Бір өзің желеп-жебегім!..
Қиып та қалай кетермін,
Қиналғанымда не етермін,
Қиырдан қайтіп жетермін?!
Өргенеді өзегім!..»

Шақун мақұлдап қымығандай болады.
Ақ Жайық асықпай шымырлап ағып жатыр...



Әзәзіл

— Әнебір бозөкпеге көз қырыңызды сала жүріңіз, — деп сыбырлады Меңдікарин, алдыңғы катарда отырған, бетінің тыртығы бар шынжау баланы нұсқап. (Меңгеруші, әдеттегіше, биыл да бұлардың пәні бойынша құрылған комиссияны басқаратын.)

Қазима ептеген әтір иісін сезді. Меңгерушінің жалт-жұлт еткен жанары жүзіне үңіліп, демі маңдай шашын шарпып — қыз көңілінің